

Get-Together – Finiziun fulminanta a Berna

■ (cp) Cun ina gronda festa sut tschiel avert è il project Get-Together, Inscunter da las linguas, i a fin questa dumengia sin la piazza federala a Berna. Cun concerts, differentas producziuns, workshops e stans da mangiar èn tut las quatter parts dal pajais s'inscuntradas per in'ultima giada – a la gronda festa da las linguas. Durant tschintg emnas èn duas gruppas da viandants stadas sin viadi atras la Svizra ed han traversà tut las quatter regiuns linguisticas da la Svizra. L'ultim toc da la ruta fin a Berna han ils giuvens creschids percurrì communablamain per lura far la dumengia, ils 15 d'avust ina gronda festa sin la

piazza federala communablamain cun tut ils interessads.

La festa da finiziun ha gia cumenzà a las 10.00. *Regina Steiner* ha dà in concert da tibia a moda moderna. Cun furmas da musica in pau nunusitadas hai cuntinuà, numnadamain cun ina cumbinaziun da steeldrums ed arpret. L'aura è lura era sa meglierada a chaschun da la proxima preschentaziun: Il bloc rumantsch cun in lavuratori da lingua ed ina prelecziun da l'autur *Arno Camenisch*. Adina dapli gleud è vegnida sin la piazza federala e fin al pled festiv da signur Jauslin, directur da l'Uffizi federal da cultura, era quella bain emplenida.

Il suentermezdi è lura stà sut l'ensaina da la musica quadrilingua. Cun Kna-cke-boul da Berna, Pamplémousse da la Svizra franzosa, la gruppa italoфона ABC Sound ed ils hiphoppers rumantschs da las Liricas Analas han ils bunamain 4000 aspectaturs pudì giudair insatge ch'è mo pussaivel en ina Svizra quadrilingua.

Buna luna, bell'aura, multifariadad culinaria: La festa sin la piazza federala pon ins considerar sco finiziun cunvegna dal project. Il rapport final definitiv manca anc, ma gia ussa pon ils organisaturs far ina bilantscha positiva. Probablamain n'ha la Svizra anc mai pudì viver ina stad uschè quadrilingua.



Impressiuns da la festa da finiziun a Berna.